



JAMHURI YA MUUNGANO WA TANZANIA

WIZARA YA MAWASILIANO NA
TEKNOLOJIA YA HABARI

Jarida La Mtandaoni

Toleo la Tisa, 2021



**DKT. ZAINAB CHAULA AWAFUNDA
WAKAGUZI WA NDANI WA WIZARA NA
TAASISI ZAKE**

NENDENI MKAYATEKELEZE MLIYOYAAZIMIA KWENYE KIKAO KAZI- MHANDISI KUNDO



Naibu Waziri wa Mawasiliano na Habari, Mhe. Mhandisi Kundo Andrea Mathew akizungumza wakati wa kufunga kikao kazi cha kutathmini utendaji kazi wa Viongozi wa Shirika la Posta Tanzania kwa mwaka uliopita 2020/2021 na kukubalina malengo kwa mwaka wa fedha 2021/2022.

Naibu Waziri wa Wizara ya Mawasiliano na Teknolojia ya Habari Mhe. Mhandisi Kundo Andrea Mathew (Mb) amewataka Mameja wa Mikoa na wale wa Makao Makuu ya Shirika la Posta Tanzania kutekeleza yale waliyoazimia kwenye kikao cha kutathmini utendaji kazi wa Viongozi wa Shirika la Posta Tanzania kwa mwaka uliopita 2020/2021 na kukubalina malengo kwa mwaka wa fedha 2021/2022.

Mhandisi Kundo ameyasema hayo tarehe 6 Agost 2021, Jijini Dar e's Salaam, alipokuwa akifunga rasmi kikao kazi hicho cha siku tano ambacho pamoja na mambo mengine kilijadili Mpango Mkakati wa Shirika kwa mwaka 2021/2022.

“Mliyokubaliana hapa mkayatekeleze kwa pamoja kwa kuzingatia weledi na nidhamu ndani ya Shirika” alizungumza Mhandisi Kundo.

Aidha Naibu Waziri Kundo aliwataka viongozi Wakuu wa Shirika kuwawezesha vifaa vya kisasa Mameneja wa Mikoa na Kuwapa wigo mpana na uhuru wa kutekeleza majukumu yao ya kazi badala ya Makao Makuu kuwa msemaji wa mwisho utekelezaji wa majukumu ya Shirika katika Mikoa yao.

Nae Kaimu Postamasta Mkuu wa Shirika la Posta Tanzania, Ndugu Macrice Daniel Mbodo alielezea namna Viongozi hao wa Shirika walivyopata semina mbalimbali za Itifaki "Protocol", Matumizi ya mifumo ya Shirika ya Teknolojia, pamoja na uwajibikaji pamoja na utendaji ndani ya Shirika.

Ndugu Mbodo amemshuru Naibu Waziri Kundo kwa kuweza kufika na kufunga kikao hicho na kuahidi kutafanyia kazi ile mikakati waliyojiwekea pamoja na yale yaliyoagizwa na Wizara kwa maendeleo ya Shirika.

Aidha kikao hicho kilichohudhuriwa na Mdhibiti na Mkaguzi Mkuu Mstaafu wa Hesabu za Serikali, Ndugu Ludovick Utouh na Postamasta Mkuu Mstaafu wa Shirika la Posta Tanzania Ndugu Deus Mmdeme.



Kaimu Postamasta Mkuu wa Shirika la Posta, Bwana Macrice Mbodo, akizungumza wakati wa kufunga kikao kikao kazi cha kutathmini utendaji kazi wa Viongozi wa Shirika la Posta Tanzania kwa mwaka uliopita 2020/2021 na kukubalina malengo kwa mwaka wa fedha 2021/2022.



Postamasta Mkuu Mstaafu wa Shirika la Posta Tanzania Ndugu Deus Mmdeme akizungumza jambo wakati wa kufunga kikao hicho.



Viongozi mbalimbali wa Shirika la Posta pichani wakimsikiliza Naibu Waziri wa Mawasiliano na Teknolojia ya Habari, Mhandisi Kundo Andrea Mathew (Mb).

DKT. ZAINAB CHAULA AWAFUNDA WAKAGUZI WA NDANI WA WIZARA NA TAASISI ZAKE



Katibu Mkuu wa Wizara ya Mawasiliano na Teknolojia ya Habari, Dkt. Zainab Chaula akizungumza na Wakuu wa Ukaguzi wa Ndani na Wahasibu Wakuu wa Wizara na taasisi zake (hawapo pichani) wakati akifungua kikao kazi cha uandaaji wa vitabu vya hesabu na utekelezaji wa ripoti ya CAG kilichofanyika Dodoma.

Katibu Mkuu wa Wizara ya Mawasiliano na Teknolojia ya Habari, Dkt. Zainab Chaula amewafunda Wakuu wa Ukaguzi wa Ndani na Wahasibu Wakuu wa Wizara hiyo na taasisi zake ikiwemo Shirika la Mawasiliano Tanzania (TTCL), Shirika la Posta Tanzania (TPC), Mamlaka ya Mawasiliano Tanzania (TCRA), Baraza la Watumiaji wa Huudma za Mawasiliano Tanzania (TCRA. – CCC), Tume ya TEHAMA (ICTC) na Mfuko wa Mawasiliano kwa Wote (UCSAF) wakati akifungua kikao kazi hicho kilichofanyika Dodoma

Dkt. Zainab Chaula amesema kuwa Wakaguzi Wakuu wa Ndani ni jichola taasisi, ni wasomi, watalaam wa kufanya ukaguzi na kubaini hoja zilizopo ndani ya taasisi hizo na wanawajibika kumshauri mkuu wa taasisi mapema na kwa wakati ili hoja hizo zifanyiwe kazi mapema na kwa wakati na zifungwe

ndani ya muda wa mwaka wa fedha husika

Amesisitiza kuwa, “tutisubiri mpaka mgeni aingie ndiyo uanze kusafisha nyumba maana utaacha buibui,” amesema Chaula na kuongeza kuwa ni muhimu kwa Wizara na taasisi zake kupata hati safi badala ya kupata hati chafu au yenye mashaka kutoka Ofisi ya CAG kwa kuwa wao wapo ndani ya taasisi, wanafahamu yanayotekelezwa na taasisi zao na muda wa ukaguzi unajulikana hivyo amewataka wajipange mapema na kuandaa nyaraka za ukaguzi badala ya kusubiri wakaguzi wa Ofisi ya CAG kuibua hoja za ukaguzi

Amewataka wataalam hao kuhakikisha kuwa mipango, mapato na matumizi yanaendana na wakumbuke kuwa Wizara hii ni ya TEHAMA, hivyo wahakikishe wanakwenda na kasi ya ukuaji wa TEHAMA na taratibu za ukaguzi kwa kuwa TEHAMA ni msingi wa maendeleo.

Muandaaji wa kikao kazi hicho, Mkuu wa Ukaguzi wa Ndani wa Wizara hiyo, CPA.Joyce Christopher amesema kuwa malengo ya kikao hicho ni kuhakikisha wataalam hao wanakuwa na uelewa wa pamoja, kubadilishana uzoefu ili kuhakikisha kuwa thamani ya fedha ya miradi ya maendeleo na majukumu yanayotekelezwa na taasisi hizo inapatikana ili Serikali iweze kuhudumia wananchi wake

Akizungumza kwa niaba ya wataalam hao, Mkuu wa Ukaguzi wa Ndani wa TTCL, CPA. Octavian Barnabas amesema kuwa anaishukuru Wizara kwa kuandaa kikao kazi hicho ili waweze kuwa na uelewa wa pamoja ya kufanikisha utekelezaji wa majukumu yao.

Wataalam hao watakuwa na ajenda nyingine kwenye kikao kazi hicho ikiwa ni pamoja na kujadiliana kuhusu hoja za CAG za mwaka wa fedha 2019/2020; utekelezaji wa mapendekezo ya CAG kwa mwaka wa fedha 2019/2020; ushiriki wa Kitengo cha Ukaguzi wa Ndani katika ufungaji wa hesabu na ukaguzi wa CAG; na uandaaji wa hesabu za mwaka wa fedha 2020/2021.



DKT. NDUGULILE AENDESHA KIKAO CHA MAPATO NA MATUMIZI YA WIZARA NA TAASISI ZAKE

Waziri wa Mawasiliano na Teknolojia ya Habari, Dkt. Faustine Ndugulile ameendesha kikao cha mapato na matumizi ya robo ya nne ya mwaka wa fedha wa 2020/21 baina ya menejimenti ya Wizara hiyo na taasisi za Wizara hiyo ikiwemo Mamlaka ya Mawasiliano Tanzania (TCRA), Shirika la Mawasiliano Tanzania (TTCL), Shirika la Posta Tanzania (TPC), Mfuko wa Mawasiliano kwa Wote (UCSAF), Tume ya TEHAMA (ICTC) na Baraza la Watumiaji wa Huduma ya Mawasiliano (TCRA – CCC) ambacho kimefanyika kwenye ukumbi wa Kikwete, Dodoma

Ameongeza kuwa kwa kipindi hicho cha mwezi Aprili hadi Juni, 2021, Wizara kwa kushirikiana na taasisi zake imefanikisha utekelezaji wa majukumu yake ya kuongeza mapato ya taasisi hizo ikiwemo taasisi ya UCSAF, TTCL na TPC.

Amesema kuwa ameazimia kuzima laini za simu za mkononi 18,622 ambazo hazijahakikiwa pamoja na kuziua vitambulisho vya taifa 14,768 vilivyosajili laini za simu kwa utapeli na Serikali itawatafuta matapeli hao ili waweze kuchukuliwa hatua



Waziri wa Mawasiliano na Teknolojia ya Habari, Dkt. Faustine Ndugulile akizungumza na waandishi wa habari kuarifu umma kuhusu kikao cha mapato na matumizi kwa robo ya nne ya mwaka wa fedha 2020/2021 cha Menejimenti ya Wizara na taasisi zake kilichofanyika Dodoma.

Katibu Mkuu wa Wizara hiyo, Dkt. Zainab Chaula amesema kuwa kikao hicho kimefanyika ili kufanya tathmini ya utekelezaji wa majukumu na mapato na matumizi ambapo Wizara imekusanya mapato ya Mkongo wa Taifa wa Mawasiliano ya shilingi bilioni 45 ambayo yamezidi makadirio ya shilingi bilioni 30. Pia, ameishukuru Serikali kwa kuongeza bajeti ya Wizara ya mwaka wa fedha wa 2021/22 kufikia shilingi bilioni 240 ukilinganisha bajeti ya shilingi bilioni 15 ya mwaka wa fedha 2020/21.

Naye Kaimu PostaMasta Mkuu wa Shirika la Posta Tanzania (TPC), Macrice Mbodo amesema kuwa huu ni utaratibu mzuri baina ya Wizara na taasisi zake kwa kuwa kila baada ya miezi mitatu kikao kinafanyika na kwa kipindi hicho Shirika limezalisha faida ya shilingi bilioni 3.6; kuboresha huduma ya duka mtandao ambapo wajasiriamali wadogo wanafanya biashara duniani kote.

Kaimu Mkurugenzi Mkuu wa Shirika la Mawasiliano Tanzania (TTCL), Mwita Vedastus amesema kuwa Shirika limepata faida ya shilingi bilioni 12 kwa mwaka na kwa robo ya nne ya mwaka wa fedha wa 2020/21 wamepata faida ya shilingi bilioni 2 kwa mapato ambayo hayajakaguliwa pamoja na kutoa huduma ya data kwa wateja



Mkurugenzi Mkuu wa Mamlaka ya Mawasiliano Tanzania, Dkt. Jabir Bakari akiwasilisha taarifa ya mapato na matumizi ya robo ya nne ya mwaka wa fedha wa 2020/21 ya taasisi yake kwenye kikao cha Menejimenti ya Wizara ya Mawasiliano na Teknolojia ya Habari na taasisi zake kilichofanyika Dodoma.

223,000 wa taasisi za ndani na nje ya nchi na watu binafsi

Afisa Mtendaji Mkuu wa Mfuko wa Mawasiliano kwa Wote (UCSAF), Justina Mashiba amesema kuwa kikao hicho kinawezesha kupeana mrejesho baina ya Wizara na taasisi zake ili kufahamu mapato na matumizi kwa kipindi hicho ambapo UCSAF imezidi malengo kwa kukusanya mapato ya shilingi bilioni 9 tofauti na makadirio yaliyopangwa awali ya kukusanya shilingi bilioni 8.

Ameongeza kuwa wamefanikisha ujenzi wa minara 60 ambayo imekamilika na kutangaza zabuni za kupeleka mawasiliano mipakani katika kata 190 na halmashauri 10 kwa kuwa zinahamia majengo mapya ili wapate huduma za mawasiliano.



Waziri wa Mawasiliano na Teknolojia ya Habari, Dkt. Faustine Ndugulile akiteta jambo na Katibu Mkuu wa Wizara hiyo, Dkt. Zainab Chaula wakati wa kikao cha kutathmini mapato na matumizi ya robo ya nne ya mwaka wa fedha wa 2020/21 cha Wizara hiyo na taasisi zake kilichofanyika Dodoma.

WAHARIRI WAPIGWA MSASA KUIFAHAMU WIZARA YA MAWASILIANO NA TEKNOLOJIA YA HABARI



Wizara ya Mawasiliano na Teknolojia ya Habari imefanya mkutano na wahariri wa vyombo vya habari nchini kwa lengo la kuwajengea uelewa ili waifahamu Wizara hiyo, taasisi zilizo chini ya Wizara hiyo na majukumu yake, mafanikio na matarajio ya kuhakikisha jamii ya kitanzania inapata huduma bora za mawasiliano zinazoenda sambamba na mabadiliko ya teknolojia.

Akizungumza na wahariri wa vyombo vya habari katika mkutano huo jijini Dodoma, Waziri wa Mawasiliano na Teknolojia ya Habari Mhe. Dkt. Faustine Ndugulile amesema kuwa Wizara yake imeona umuhimu wa kukaa na wahariri hao kwasababu ni watu muhimu katika kuelimisha na kuhabarisha umma namna Serikali inavyohudumia wananchi wake kupitia Sekta ya Mawasiliano.

Amesema kuwa Wizara hiyo yenye miezi sita tu tangu kuundwa kwake ni Wizara yenye majukumu makubwa ya kuleta mabadiliko ya kidijitali kuelekea mapinduzi ya Nne ya Viwanda kupitia TEHAMA.

“Sasa hivi dunia inaelekea kwenye matumizi ya teknolojia zinazoakisi akili za binadamu “artificial intelligence” katika shughuli za kiuchumi ambapo mashine zitakuwa zinafanya kazi zenyewe, hivyo na sisi kama nchi lazima tujipange ili tupige hatua sambamba na mabadiliko haya ya kiteknolojia”,

Alisema Dkt. Ndugulile. Ameongeza kuwa Wizara hiyo ina jukumu la kuandaa mazingira wezeshi kuelekea uchumi wa kidijitali, biashara mtandao, kuweka maunganisho ya kidijitali ndani ya Serikali na katika vituo vinavyotoa huduma za kijamii ili kurahisisha ufikishaji wa huduma kwa wananchi kiganjani bila kupanga foleni.

“Wizara hii sio ya mabando tu, ni Wizara yenye majukumu mengi na mazito ya kuwezesha kuleta mabadiliko ya kiuchumi katika nchi kwasababu inagusa Sekta zote hadi za usalama wa nchi na nyie wahariri ni watu muhimu ambao mnaisaidia Serikali kutoa taarifa, elimu na hamasa kwa wananchi, hivyo mkii-fahamu vizuri Wizara basi tunaamini wananchi watapata taarifa sahihi”, alisema Dkt. Ndugulile.

Naye Naibu Waziri wa Wizara hiyo Mhe. Mhandisi Kundo Mathew amesema kuwa Wizara ina dhamana ya kufanya maandalizi ya kupokea mabadiliko ya kiteknolojia yanayokuja kwa kasi na kuendelea kushauri namna bora ya kupokea na kuitumia teknolojia iliyopo na itakayokuwa ndani ya soko.

Aidha amewashukuru wahariri hao kwa ushiriki katika Mkutano huo kwa sababu wao wakiifahamu vizuri Wizara wataweza kuufikishia umma taarifa sahihi zinazohusu utekelezaji wa majukumu ya Wizara kwa sababu taarifa zote zinapita katika mikono yao kabla ya kwenda kwa wananchi kupitia vyombo vya habari wanavyohudumu.

Naye Katibu Mkuu wa Wizara hiyo, Dkt. Zainab Chaula amewahakikishia wahariri wa vyombo vya habari kuwa yeye na watendaji wa Wizara wako tayari muda wowote kufanya kazi na wahariri hao kwa kuwa wao ni daraja baina ya Serikali na wananchi.

Akizungumza kwa niaba ya wahariri, Mwenyekiti wa Jukwaa la Wahariri, Deodatus Balile ameishukuru uongozi wa Wizara kwa kutambua umuhimu wao na kuwaaalika kwenye mkutano huo na wamejifunza na kufahamu majukumu ya Wizara hii kwa taifa.

BODI YA WAHIRIRI

Mwenyekiti

Dkt. Zainab A. S. Chaula

Katibu Mkuu

Wizara ya Mawasiliano na Teknolojia ya Habari

Mratibu na Mhariri wa Jarida

Prisca J. Ulomi

Mkuu wa Kitengo cha Mawasiliano Serikalini

Mwandaaji wa Jarida

Faraja Mpina


Wasanifu wa Jarida

Janeth Peter

Waandishi wa Jarida

Prisca J. Ulomi

Faraja Mpina



**Limeandaliwa na Kitengo cha Mawasiliano Serikalini
Wizara ya Mawasiliano na Teknolojia ya Habari
S.L.P. 677,40470 Dodoma, Tanzania
Barua pepe: ps@mawasiliano.go.tz
Tovuti: www.mawasiliano.go.tz
Instagram: Wizaramth**